

國
朝
詩
鐸

國朝詩鐸卷二十一

錢唐張應昌仲甫

義行

王澤宏捐粟行見賑饑門

顧景星惡溪漁父篇見清廉門

紀王備五事

備五以吉壤贈孫嘉客
葬其親棺余詠其事

嚴 榘

君不見富家子弟爭遺金闕牆禍起干戈尋錙銖分寸
不可奪豈得揮金肯濟人又不見今時黃金交貴游樽
前然諾死可酬雨雲背面莫復保世上悠悠盡此儔我
友向人慙肝膽推奉佳城動悲感麥舟古誼久淪亡獨

行芳名誌幽坎王侯王侯天下無賢君賢君仗義扶但
看贈地完窀穸愧爾見義不爲諸儒夫

三義行

蔣士銓

克什泰何堂堂鑲藍旗人贊禮郎不讀書略識字耳內
不甚知聖賢性中獨自有仁義一妻二子三十餘出入
乘一馬亦無婢與奴凡其所行事皆曰古丈夫官滿當
外補送者來塞途哭聲哀哀手執袪古丈夫去今更無
江甯進士曰龔孫枝歷仕到古州官理苗同知文士作
循吏才大而數奇以事鐫級走京師眷屬二十口孰救
寒與飢後官爾何人是爲克什泰前官衣食我任之他

家飽暖吾心快如是五六年施者受者皆自然但日前
官是好官龔君遙遙感且歎及龔倅東昌家人始團樂
一舟素旄經河干嗚呼古丈夫死矣身在棺是時龔奉
檄往督糧艘還遲遲半載龔遊長安訪于太常街孤孀
漸飢寒龔哭失聲相慰勞苦貸錢買屋奠厥居醢酒頻
澆趙州土二子十餘齡當延句讀師雖然世稟仁義性
亦須偕誦賢聖詞嗟哉奇士適遇之義行更爲古所稀
奇士名龔涵是爲君從子年二十二美且都從君遠到
長安市涵婦翁方應綸丞束鹿召涵婚涵聞兩孤且廢
學長跼叔前流涕陳願不負叔生死誼涵請暫留贅婿

身斷齋畫粥偕二子或者師弟皆成人叔笑且悲告邱嫂孀乃擇吉延師云嗚呼三義士先後同一轍誰道今人棄如土各以酸心傾熱血噫噓唏請君讀我三義行一死一生見交情君不見黃金滿籝惟自固轉眼兒孫嘯道路

汪義士歌

又

西泠有義士姓汪名耀川幼不習詩書而能率性天曾事宋令尹樹穀結交諸名賢槩槩才既大觥觥志亦堅宋公故廉吏謫戍到窮邊妻孥泣相顧親朋睨不前耀川愾然請公行無憂煎精衛尚填海頑石亦補天公雖有

八口儂豈無一肩願以家事付竭力爲周旋宋公感其
義相誓爲昆弟從此一諾終便結千秋契縫人將衣供
廩人將粟繼助發賃屋錢爲兒辦婚費亡何宋公亡羈
魂墮遐荒君又駕素車歸骨葬故鄉于今二十霜道路
皆感傷我聞李次孫東漢聲隆隆卵翼幼主人兩乳爲
流潼身作太守歸走拜墓門松于今千餘載誰能繼此
風獨行耀川子行事將毋同如看西湖山南北兩高峯

撫孤行爲畢尙書作

袁枚

我聞郭代公四十萬緡脫手空又聞魯子敬捐千困粟
作投贈此皆周恤生前朋不如畢尙書待死友有深情

諸公聽我撫孤行

一解

新安魚門子姓程字戡園平生

著述千萬言重仁襲義人稱賢只有作家二字天性短

玉卮無常不能盛一錢食翰林俸逋負如山長髯拂拂

兩眉皺急走西方求佛教

二解

彤彤徂暑乘舁棧車烈

火燒其心炎風炙其軀行年六十膺煩紆望見畢尙書

當作菩提如尙書迎入南衙居只道故人來不圖新鬼

俱奄然一病遽委化瞑目而去片語無

三解

尙書親視

含殮泣下數行楸柎爲藉幹袒免爲服喪三桃湯五穀

囊一一布置加周詳柳翼駢羅羽葆輝煌送歸靈輜白

下葬旁人嘖嘖相誇張道如此異鄉死哀榮勝故鄉

四

解

死者樂矣生者哭矣孤兒曾曾無棲宿矣尚書聞之

又買屋矣可奈尚書官大梁孤兒居建業昏夜乞水火

鞭長莫能及魚門平日交滿海內空紛紛誰管東里西

華冬日猶衣葛練裊如枚百輩何足數只能代爲躅足

仰望高天雲

五解

闖然明駢千里來黃金百鎰光皚皚

交與桐城俠士章淮樹替主進替營財但許取子不取

母十年以後交兒手

六解

七月二十四日隨園風和章

公挈孤兒載酒相過作畫紙券唱得寶歌頃刻金城干

萬丈崽子嫋嫋得依傍

七解

滿堂賓客額手再拜不信

當今古人尚在一叟無言搔白頭招阿遲來笑不休而

翁縱死汝無憂汝不見畢尚書風義高千秋

八解

琴堂花燭詞

菰城姚氏女名家女也父母流寓姑蘇鬻女於人不屈得返再鬻於上滬

鈞闈中女年十四以死自守上邑簿嚴君湖人也得其狀告之葉大尹立提出之適金陵藍君嘉瑞自江右攜丁生慶齡來年十五遂爲當堂配合丁生之祖前宰高安左遷負累子婦俱亡託孤于藍余重三君之高義爲賦此詞

徐煜

太湖滄海相連屬海潮浩浩湖波綠湖波蕩漾繞金閭

姚黃一朶凌波擢盡道姚黃富貴花如何飄蕩落天涯

只緣根託寒檐下父母門楣望太奢門楣深恨牽蘿代

掌上明珠擎出賣負氣旋成合浦回人不憐花花自愛

誰知轉徙更風塵誤踏鈎欄到海濱錯將天上瑤臺種

認作人間桃李春。絳旌難開毛羽弱。願禮空王聽梵鐸。
并刀燕尾觸風雲。青絲亂作花鬢落。別尋覺路覓金繩。
誓捨微軀恨不勝。投繯翻似連環解。血染羅襟半作冰。
蒿里無門天悄悄。花枝不萎花魂裊。肯隨路柳颺飛花。
要使疾風知勁草。琴堂鼉鼓響鳴雷。鐵索硃符風雨來。
花骨峻嶒好調護。花身潔白脫汗埃。令威遺嗣孫枝秀。
十五孤生寄江右。千里帆催十幅蒲。江流東下寒潮湊。
仙手提攜學弄潮。采和海上賦逍遙。翦拂孫枝求並蒂。
藍衫揮手現藍橋。藍橋只在琴堂上。作合居然歌百兩。
雙飛何幸展青廬。萬口爭傳誇錦障。姚黃得地冠芳叢。

依然富貴倚天工。要知榮重千秋事。本在堅貞一念中。
堅貞一念難移。改神物從中爲主宰。鞭策魚龍作赤繩。
江湖會合歸滄海。老夫幕府養微疴。勁節奇緣驚喜多。
佐成案牘書鴛牒。更學香山紀事歌。

義米行

范來宗

熙熙攘攘何喧填。走領義米羣摩肩。吾祖贍族創自有。
采南渡前至今遵。守七百年歲云暮矣。百事煎熒笑之。
族望眼穿先日示。期城莊傳九房一十二支來者千有。
貧無富醜無妍鰥寡孤獨奇窮全堆盤。有肉白粲鮮會。
食饜足腹果然于橐于囊更有青銅錢。君不見歲荒比。

戶多顛連欲乞升斗誰能憐

義田歌

爲秦蓉莊
先生作

龔景瀚

三代以降廢宗法收族無人恩不洽各子其子親其親
百富未聞周一乏祖宗當日本一身其後泛泛如途人
吉凶患難不相顧嗚呼風俗何由溘昔聞有宋范文正
始作義田贍族姓忠宣繼之制益詳姑蘇事業今猶盛
此意悠悠五百年誰將遺事法前賢功名及遠不及近
胞與爲懷亦枉然祖宗餘慶鍾孫子孫子官高但爲已
倡優醉飽僮僕歡豈識族人飢欲死先生乃有古人風
殫力經營甘載中千畝腴田供舉火導源實始贍和公

尊甫賡和公始倡捐百畝先生增至千畝父子同心世濟美淮海而來方有此秦氏出於少游此田萬載復千秋惠水長流錫山峙

築客墓歌

桐溪姜生某葬其客某之貧無後者於某鄉亦敦交僅事也書以廣其風焉

吳文溥

切切貧賤交悽悽生死路生寄伯通家死築梁鴻墓梧
桐鄉畔梧千尋墓門遙接梧桐林春來細雨土花溼蘆
上啼鳥似相識隻雞斗酒故人心宿草新年作寒食不
見屠沽遊戲多少年朝盟金石暮已寒男兒道義交可
久心跡磊落到白首嗚呼姜生不負死友況生友

紅于行

梁履繩

有鳥栖珍樹一雄復一雌雌者守舊巢雄者翔空枝一
朝去求食求食忽遠飛遠飛挾兩雛兩雛各分離雄歸
雛不返雌也心傷悲四顧欲尋覓茫茫何所之城東有
良家門第多光輝不幸條中落錯迂人世非刻卻心頭
肉攜女出寒閨十五固不足十一猶有奇有姊先鬻去
不知屬阿誰此女更嬌小母氏憐如兒父作不良計潛
賣恐母疑各各不相見背地淚沾衣生長在良家轉眼
成卑微昔爲掌中玉今爲絮邊泥昔爲欄前桃今爲井
上葵父鬻入我家朝夕捧槃匱當窗喚新名欲磨還遲
遲歲月一何速條焉兩戟移阿母思見女泣問爲父欺

還家告兄弟兄弟俱慘悽奔走訪媒妁言語互參差宛
轉識處所造門前致辭始知通家誼說罷相嗟咨喚出
認舅氏攜歸不取貲羅遜焚賣券鍾離備妝資若女卽
吾女高義世所希富貴非常恃歛若朝露晞緬彼前哲
風君子恥獨爲好去見阿母阿母長相晞好去見阿姊
贖歸已先期並肩事阿母兩雛復安栖哀免此王孫困
苦泣路陲

祿兒歌

洋驛叛兵之亂權華陽丞劉錫民死焉其僕祿兒年十四於城壕積尸中求其主尸

不得繼于血肉枕藉中得一身面目糜爛不可辨右手尚持小刃識爲主人所佩物遂驗以待其子來徒步送歸潞河噫劉君死猶恨不刃賊僕亦忠義哉紀以詩黃孫瀛

灑水不流血不漉風寒白晝青燐煜烏鳶啄肉不敢前
鬼哭聲中雜人哭枕尸反覆血模糊晝夜三周眯兩目
天憐節義標識奇忽得糜軀已無肉平生佩此百鍊鋼
既死公然刀在握想當格鬪隕微軀余不負丞差免辱
吁嗟乎丞也食祿死固宜小僕忠義乃若斯送歸丹旄
嗚咽隨試聽慷慨歌祿兒

華亭姜氏捐田詩

華亭姜懷權以諸生應乾隆庚午鄉試病不能致醫藥卒于逆

旅其妻陳苦節四十餘年疾革謂其子軾曰汝父以貧故遺疾不得藥而隕生汝他日稍能樹立必思有以佐寒酸者軾謹識之而家累頗重終不克舉迨其孫熙家稍裕始捐華婁兩縣常稔田百畝爲賓興之費呈縣立案

孫能繼志而陳母導子孫尤難得也

張興鏞

青氈一例但空囊
夜讀聊分鑿壁光
近事傳來增歎息
元澄祝映孝孫姜

父書祖硯守窮年
負郭難謀一稜田
猶有報劉心事在
秋風日斷秣陵煙

有志移山事竟成
菑畬經訓十年耕
海濱正讀開科詔
願獻膏腴助鹿鳴

此舉辛勤出孝思
焚香好報九原知
我家白下親高義
別寫寶興紀實詩

義士行

徐熊飛

天下無義士朋友倫
乃絕朝爲知己暮寇仇
薄俗紛紛

那可說汪君意氣何嶙峋肝膽照人久更眞平生獨與
宋君友如手足不離其身宋君出宰兩當縣遣戍新疆
習征戰全家八口苦飢寒臨別愁看淚如霰是時送者
滿江沚君獨旁皇拂衣起爾親吾親子吾子有渝此盟
如白水穹廬萬里宋君歿匹馬西行拾殘骨馬毛結冰
馬蹄熱往往夜墮流沙窟生人死友同入關葬向南屏
鬼嗚咽君行苦遠家苦貧謂友未死猶吾存寸心誓不
負泉壤呼以義士不忍聞君不見南山有烏尾畢逋梧
桐搖落竹實枯破巢完卵古不保白頭老鴉代哺雛義
士之義今則無嗚呼義士今已無翻雲覆雨何爲乎

臺灣三仁詩

陳裴之

壽先生

名同春諸暨人年七十二佐臺灣淡水

郡丞程峻幕乾隆丙午冬林爽文陷竹塹城郡丞死之先生糾義民復其城遂攝丞事明年隨官軍進駐烏牛欄逼賊巢遇伏兵潰馬蹶被執罵賊死事聞 敕建三仁祠于臺郡李義士劉烈女與焉

臺灣姦民殺官弁草疏千言飛告變疏言草野臣同春

郡丞程峻之故人程峻死賊賊入署斗大巖城賊爭據

臣率義民克復之解圍專望馳雄師微臣雖無守土職

郡丞一印臣擅攝昧死陳情達天闕神策軍來爭破敵

自願隨營殺蟻賊烏牛欄前白刃接賊敗大呼伏兵出

矢竭弦亡外援絕馬蹄一蹶身被執丁未季冬月十日

罵賊常山死不屈事聞 當守殞身一廟食千秋獎忠

烈吁嗟乎廟食千秋獎忠烈乃是諸侯老賓客

李義士

名喬基嘉應州監生林賊初亂在彰化團練鄉勇堅守鹿仔港丁未正月進大

里塹攻西門不克二月復至牛馬莊勦賊被執遭燹死

老罷當道臥貉子那得過大軍未集孤城傾壯士一呼
賊鋒挫貫不必橫衝都衆不必鷓兒兵鹿仔港接彰化
城毛葫蘆卽君子營一戰大里塹再戰牛馬莊礮聲如
雷地中起殺賊不克被賊戕賊戕眞義士 詔書煌煌
傳廟祀粵東嘉應國子生喬基其名李其氏

劉烈女

名滿姑臺灣郡丞劉亭基女賊陷彰化女依父不肯逃父被害投池不死賊引

之出女怒罵不止
遂遇害時年十七

戀父心甘白刃蹈滿姑死烈仍死孝罵賊不畏遭羣凶
滿姑死孝還死忠三尺刀光一池水滿姑知生不如死
君恩隆祀臺灣城滿姑雖死仍如生史乘千秋載奇節
劉郡丞女年十七

前題

蕭掄

臺灣淨掃無風塵 天子下詔褒三仁三仁何姓氏一
爲壽同春淡水郡丞老幕賓丞亡攝官克復城出兵勦
賊死賊營其一嶺南客國子生寓彰化糾義民其姓李
氏喬基名守鹿仔港有成績戰牛馬莊終殞身同時見

此二義士一弱女子尤絕倫滿姑年十七父曰劉郡丞
賊先執丞脅誘姑姑不受辱泣且嘔蹈河不死罵益烈
白壁雖碎聲錚錚是三人者微且輕非將非吏非守土
臣身雖死義分甘沈淪幸遇天子大聖明幽遐必矚
名教是敦曰此三人縱疏賤磊落大節宜予旌詔建
祠宮楹栊維新有司歲時祀以特牲爲問蟻賊起事辰
士民奔走婦女被掠何無一人能及此三人吁嗟乎人
人具有忠孝情盍至三仁祠下一聽天子命祀之

恩綸

妾入門

吳文免牀置一婢詢之爲良家子遂撫爲
義女命與女公子齒擇武原魏氏子備奩

具嫁之錢唐邵徵君志純賦妾
入門以紀其事余亦數韻賡之

曹宗載

妾入門悸心魂向隅無言淚暗吞妾入門銜主恩烈冬
翻作陽春溫芳蘭蕭艾殊非伍妾賤那得比公女胡緣
伴坐畫樓中飛絮同吟繡同譜武原之水清且漣弱翁
之子才翩翩結褵遣嫁情纏綿于歸恰值桃夭妍今古
英賢幾蒙垢誰肯憐才一援手天蓋高地蓋厚罔極恩
深父與母龕門水汪洋洪波深澤寧可量秦駐山嵯峨
高風峻德終難磨噫嘻山可鑿水可涸此恩此誼千古
卓

張童子歌

名致中年十六得千金於路白其母俟
訪者歸之不受謝余上其事於臺司

夏寶晉

訴牒日已多爭奪靡不有錐刀末已競秋毫太息何時
風俗厚犢車償其轅過我大衛村囊橐忽不見見者不
識爲金銀是時方五月草深坡路滑童子行田腳不鞮
舉步偶觸之纍纍何勃窣念此何來坐兀兀道旁來糞
車呼而載之歸諸家其家有賢母謂兒此物非義取童
謝其母但守之出門徧告村人知有來訪者吾何私犢
車入城失金大驚捕者過市衆譁不止貲財百萬且有
餘失者之憂得者喜回車大衛村村人引至童子門見
母語之故願與均分母不顧呼兒攜還戒勿酬事後之

酬卽爲賂拾遺非所求乾沒乃足羞有非所有禍必至
失者之喜得者憂烏虜得失本如此村豎猶能識廉恥
胠篋穿窬大有人息爭去僞從茲始爰表童子居命曰
廉讓里賢哉是母有是子我聞其風飭篋簞

崇義行

爲陝西李公子頴作頴父名大霽官常德郡守

王之棠

君子重義小人重利重義利自輕重利義乃棄我聞魯
子敬指困傳高行古人誠可型猶未能閔人孤矜人寡
謀人室活人生如我敏齋李公子高義真難名解一公
子之父曰大霽居官清潔存古風一朝出守朗州郡身
攜公子隨花驄其時公子尚在幼學延訪名師用資訓

讀惟我外家大父吳卓齋夫子稱宿儒遂膺太守之聘

而來居

二解

太守視師奉若龜筮夫子視弟切如子姪

千里送試艱苦嘗果然高擢藻芹香俊鵲摩雲健明珠
照乘光太守感師教慇懃隆禮貌方期永爲好誰知一

葉催歸權

三解

太守歸去卅年間音容杳杳鱗鴻慳卓

齋夫子久辭世惟四舅氏僅存一誰恤桓痿苦誰憐趙
氏孤矧乃數米而炊寄籬而處長年鬱鬱氣不吐此情
此事向誰語

四解

乙酉之冬梅花開翩然公子襲裘來

劇訪師門走湫隘細詢家業嗟隳頽萬鎰賙何惜一時
力不濟屬我明年抵京華付我金錢三百緡無差一百

爲舅營生資一百爲舅賃住屋一百買妾爲後謀莫使

延陵一脈無人續

五解

吁嗟乎世人結交須黃金疇把

黃金贈故人師與弟合以義茫茫道里隔山河幾人相

睽還相憶賢哉李公子風義真無比爲我舅氏謀周詳

乃如此公子如此太守有子太守有子至今不死

六解

莎哥行

莎哥姓沈名世麒秀水人少無賴咸豐十年賊自丹陽東下陷數郡應募率鄉勇守

平望力戰死之

金鴻佺

生不願作多田翁酒徒無賴皆英雄又不願讀萬卷書

彎弓擊劍輕頭顱莎哥一擲百萬賭笑殺人問守錢虜

睚眦必報恣橫行孝侯爲害能射虎鼓鑿動地飛矍矍

破竹千里何人攻子龍一身都是膽隻手直欲撻其鋒
有如甯武忠武公功雖不成心則同模糊碧血灑古渡
獨樓提出無人顧英靈應儷五人墓

義僕行

庚申之難聞溪沈氏老僕張大進攜主人幼子共逸途中被擄泣求身代竟獲免後復失散沈氏子於南漚邨爲酒家傭適與僕家近時以衣食相貽問其年七十八矣尔慕其義

作詩表之

唐 員

程嬰杵曰名卓卓吾鄉張老殆其屬獨攜幼主避戈兵
備歷艱危情愈篤一息藐孤屬老奴聊爲主人延殘局
那知倉猝失歧途徧覓還疑登鬼錄相逢忽作酒家傭
握手吞聲悲莫贖殷勤如母亦如師懷楚相憐復相勗

君不見落井偏多下石徒。疾風勁草愧流俗。嗚呼疾風勁草愧流俗。人世難逢此義僕。

附錄 哭義僕陳四

四諸暨人道光戊戌來余家性忠直敦朴無嗜好有膂力惟好武習拳勇

弓石咸豐癸丑入仁和庠應鄉試再今春浙闈馬步矢入選未及試刀石而賊至遂輟試城破焚掠四家與余家並遭厄是時度無生理四以同死相約余謂吾老弱待斃而已但吾已無子孫生仗汝扶持死仗汝埋斂汝不可死也則伴謀焉而乘間忽攜刀矛出門殺賊遂遇害余走避僻所數日兵至賊走求其屍不得有見其殺賊四五人者蓋賊怒之投於火矣余爲作傳

張應昌

陳僕從我游二十三載久雖爲主與僕若父子朋友秉心惟正直樹德在醇厚九石弓可彎百斛鼎能負天生

必有用好武意赳赳待奮貔虎威肯逐牛馬走朝夕勤
股肱餘閒練身手兼全智仁勇不愛財色酒一朝升膠
庠若發冠其偶以此干城資况逢戎馬糾探囊取公侯
拾芥視組綬而乃甘蠖屈相依垂白叟憐我蘭摧庭念
我雪蒙首助我治饗饑隨我茹藜糗旨蓄儲晨昏量度
到井臼出門同扶持司夜獨邏守紀綱倚一人伶仃安
數口同輩皆不賤馳騁營門柳爾獨甘窶貧埋才處蓬
牖鄉選非遠遊秋風志抖擻跋予望鴻飛高翔離澤敷
今春浙闕中爾已什得九幾日宴鷹揚側耳聽獅吼忽
然鼙鼓來驚破湖山陡崇朝薄城垣八日關鎖鈕衢巷

鳥鳴火身家魚在苟萬事都已矣薄命願離垢爾以同
死勸自了全歸受免污賊刀鋸毒痛恣躡蹂爾言誠是
也吾更分別剖吾本旦暮人老翁伴弱婦咨嗟行路難
待斃如械梏但我子孫亡賴爾爲臂肘吾存仗保持吾
死託身後吾死事當然爾死理無取抱頭流涕說諒爾
意無忸豈料一朝忿獨身戰羣醜赴火蛾翎焚當車螳
臂培傷哉肉成齏壯矣膽如斗烈士雖錚錚故主倚誰
某誰知賊旋去脫網吾无咎室人均團欒但失爾左右
大謀在小忍一死輕培塿爾勇誠霄冲爾智等槃扣爾
死吾徒存皇皇喪家狗恐懼棄如遺流離活亦苟爾遇

鏡中花爾志泥中藕傷爾名無成傷爾骸速朽千里我
飄然九泉爾知否平生失意事此僕今無有

陳武生行

和仲甫伯父作○事見前應昌哭陳四詩題注

張興烈

地雷一震城門開賊欲入城兵爲媒兵耶賊耶合而一
反戈相向轟然來殺人縱火恣淫掠羅城頃刻飛黃埃
千家萬家盡號哭哭聲上天天宇摧或降或死或出走
官民一例同草萊吾家有人奮袂起袒臂大呼好男子
平生有膽大於身見賊不殺真可恥手攜一刀肩一槍
挺身出門莫敢止街頭遇賊急揮刀漉漉頭顱血如水
連殺數賊衆賊來前有戈矛後弓矢裏創血戰戰方酣

可惜英雄力竭矣肝腦塗地骨肉齧怒目炯炯猶未死
事平無處覓遺骸里郇于今稱烈士烈士者誰其姓陳
仁和武生諸暨人年四十七勇絕倫死於咸豐庚申春
吁嗟乎匹夫之怒有如此將帥紛紛反愛身

附錄靈異物性吟

物非人匹毋乃擬不于倫顧人爲萬物之靈秉天彝之德而多虧慙

內行者是反不若物之能盡性者也孔子云犬馬能養孟子云人之異於禽獸者幾希至於禽獸不若罪戾深矣近人詩中有詠物之忠義孝慈者假物諷人亦原本風詩相鼠鳴鳩比賦之義冀讀詩者之感愧奮興也則固弗嫌於不倫之擬也因就所見采摭一二附存之偶鈔未及備采

鳥反哺

以下共四首

顧夔璋

鳥鳥鳥曉夜呼雛羽未乾老鳥飼雛老鳥力盡雛敢離

乎烏反哺樂于于人生失養子不如無。

蜂戀主

蜂蜂蜂房如壻善守衛兼突衝排衙事主負戟分封君
臣大義翊贊從容凡百君子愧爾靖共。

虎乳兒

虎虎虎無物伍既愧駟虞復異牛牯其視眈眈誰堪察
猶詎意白額斑終身不再乳殘不傷嗣慈將兒護虎乳
虎乳可鑒人父

雁巡更

雁雁雁堪諷諫翅雙飛心同縮一雄懼禍一雌永纂甯

甘孤警不甘溲，燭清夜嗷嗷聲。淒影眩能令嫠婦淚，落如漉。

孝牛行

康熙丁丑冬，崗前佃奴之牯牛新生，一犢纔數月，天寒甚，又水草失時，奄奄待斃，聞

母噓張目奮蹄，就母無力，倒斃。夫牛也，雖死猶不忘其母，作孝牛歌，齊之于

我聞昌黎言禽獸有人性，慈烏與義馬異類之賢，聖虎亦媚養已鷹，能效主意，愚者莫如牛。猶知身所自呼吸，命須臾，僵蹄卓於地，欲前不得，前銜恩，不忍棄形，死意還留，蹶然首邱，志牛也。爲人役，曾不解禮義，可以人弗如而不錫爾類。

前題

婁縣天馬山北，和尚濱李德明家黃牛，產犢五歲，母老不能耕，李驚于彭牛子，母同欄母。

牛鳴子牛應之淚雨下彭牽牛出縛牛磨刀待屠子牛齧斷繫繩奔母牛所至彭前銜刀徑吞母牛向子牛鳴不已德明心動還魏堃

世無介葛盧莫識牛聲鳴牛聲鳴人莫磨牛吞刀而吞

聲解一

天馬山北和尙瀆靈鍾於牛知有親母老不復

能春耕解二

牛不能耕牛待死牛待死兮幸有子牛有

子母不死解三

屠牛者彭鬻牛者李方其香刀時李亦

汗有泚還金縱牛歸牛歸樂搖尾解四

樂搖尾由徑仄

樂搖尾歡無極昂首長鳴報主德并力耕田代母力解五

代母力行原野歸依母牛欄下子知有母物猶且奈

何人不如請觀此耳濕濕者解六

國朝詩集卷二十一靈異物性

七

吳興孝狗行

陳章

署中一狗黑如漆孳生四子各毛質或死或逸去其三
只有一狗不相失日月易邁此狗老兩眼模糊難了了
嘗聽人過尾徬搖空見涎垂腹不飽其子遑遑東復西
候筵帖耳還首低賓客餐餘每投棄啣致老狗骨與糞
我見謂其偶然耳明日試之亦若此不惟跪奉如羔羊
堅硬猶先囓以齒今有儼然成丈夫華衣甘食惟自圖
老親餓死倚墻壁遠遊若不關肌膚此誠吳興狗不如
義豹行德勝鎮山中一豹能爲近鄉禦虎居民德
歲時以犬豕酬賽余聞其事作義豹詩

商盤

南山霧濃元豹變七日文成人共見此豹不與常豹同
驅逐於苑垂大功蠻村雞犬聞鳴吠深夜不遭猛虎害
居民感德比神麻歲歲春秋爭報賽少陵義鵠曾作歌
義馬勒石長不磨人生識字忘大義不如此獸天良多
吁嗟豹兮吾邈汝異政何時能渡虎

義鵠篇

庭樹鳥巢有二雛一雛墮而殞其一爲蒼鷹搏去次日羣鳥咸集若弔唁狀卓午雞

忽歸羽襟襟困憊衆鳥相與引喙煦煦之無何鷹復至羣鳥號余命童據花鈴擲掄之乃去而仍日一二至越六日侵曉羣鳥十百叫噪甚異啟戶視則巨鳥立喬柯金睛翠羽鷄也少選鷹來鷄乃奮翼重霄搯其吭磔其毛鷄去鳥亦他徒

吳森

春眠困慵起鳥啼聲洗瀾烏鳥爾何啼孤雛慘銜冤同

儕信其母啞啞勸加餐謹譁正未已孤雛忽翩翾意態
似已成筋骨尙未殘羣鳥與鳥母煦嗅雜悲歡驚魂猶
未定貪饕復飛飜側睨勢逾很思痛聲益吞主人惡不
仁撼樹誓保全乘間屢回掠側翅垂饒涎侵晨聞呌嘯
驚起開南軒軒前有高樹大鳥立昂然被服炫錦綺仿
彿如鴛鴦貌閒時矯首志決將誅奸羣鳥翔其下儼如
奉高真彼昏竟不知賈勇來仝仝羣鳥咸屏息疊疊壁
上觀須臾毛血灑風中聞腥羶鷄去泯爪跡燕來賀喬
遷主人閒眺聽倚檻視蒼天義風在微族能令薄俗敦

白鴿篇

鴿爲桐鄉程氏所蓄雙
禽明義施節因書其事

方

薰

翩翩雙白鴿，玉立棲花房。主人殊愛惜，調護非尋常。雕籠貯深幄，紅粟開陳倉。朝放夕來歸，鈴聲隨風翔。主人一朝貧，有鴿無餼糧。衆鴿難忍饑，聯翩適他方。惟有兩白鴿，徘徊主人堂。朝飛尋燕麥，野啄充饑腸。夕歸畏狸奴，貼羽依空梁。素翰日摧頽，相顧增淒涼。恐負主人恩，他適亦不祥。雌雄不相捨，歲月情如常。虺蛇夜深至，一雄邁其殃。雌也急鳴救，力弱勢莫當。奮身奪毛羽，銜泥瘞秋塘。啄食不敢吞，先爲死者嘗。悲鳴守其側，終夜哀枯桑。淚落杜鵑赤，影比孤鸞傷。甯爲同命鳥，不作逆毛鷓。生當主人愛，死共主人旁。感此微禽義，孺士心懷剛。

烏雛行

吳鉉堂

慈烏慈烏尾畢逋啞啞返哺八九雛烏雛返哺爾何幸
嗟我失母徒號呼朝呱呱夜呱呱報母無期淚眼枯迴
腸轆轤泣血模糊爾有母養翳我獨無

義犬行

前溪之民畜一犬出恆相隨山行遇虎已口銜之犬突踞虎背齧其項虎遂舍民逸

犬亦驚悸力竭而死

嘉慶辛未十月間事

宋咸熙

犬威不如虎犬智勝於虎智由義生犬亦足千古吁嗟
人兮而不知禦侮

象豕行

豕在馬籠之南田山薑爲之銘明安邦彥奢崇明犯馬童象鼻吸泥水出賊不意躍

起數丈噴賊陣復捲一賊墜地蹴之如鶻賊氣奪黔兵乘之遂克之明日象亦死土人爲封瘞

立碣

焉

吳振棫

馬竈象冢何從寵遺聞得自山薑翁在昔安奢恣蠻訂
喋血霑益兼烏蒙山中一物來何雄吸水倒噴水有鋒
咆吼作勢賊陣衝足不踏地行如龍怒捲一賊擲半空
將士逐北收全功我聞有唐天寶中舞象不舞洛陽宮
此象憤賊將無同不惜一死成其忠烏虜不惜一死成
其忠我歌願託風人風

義馬行

爲就園都統雙成作○咸豐三年都統勒
北路賊賊夜襲營所乘馬爲礮火驚逸賊

牽馬馬蹏齧不遂行遂獲賊并獲
馬都統義之賊平作圖以表其事又

礮火燐天天色赭一軍夜驚逸其馬馬不賊屈不受糜

擒賊馬乃從而歸將軍喜極仰天笑馬亦騰躍當風嘶
古來烈士誓不事二主嗚呼此馬其庶幾潼關百尺臨
大河揚鞭入關歌凱歌當時共爾決死戰不意老骨歸
鞍馱主人報爾亦何有索畫索詩傳不朽可惜心肝不
能畫但從毛鬣論好醜君不見玉山之禾高於山太僕
歲耗官家錢毛豐肉滿不思騁天荆地棘時方艱安得
天閑十萬匹盡若此馬能酬恩蹴踏萬里清中原

義羸行

出都車下一羸一馬馬路斃羸哀鳴不食數日作此記異戴

熙

驅車出都門蹇羸兩耳銳轅前繼以馬頗不受控制質
性雖各殊用力實相濟隨行如兄弟險阻能防衛常見

附耳語同心若勉勵上道未幾日小駟忽焉斃行旅安
得惟草草垓中瘞迴顧轅下羸哀號若有涕空廐不忍
入躑躅向階砌枵腹睨生芻獨立若先祭向人再三鳴
欲訴不能細嗟爾物性微尙克懷遠逝寄言翻覆交此
語非余贅

義馬行

道光庚子夷寇粵東沙角失守三江協鎮陳公連升死之公之子又死之公之馬爲

逆所得悲鳴作人泣逆歸以芻豆不食逆乘之馬怒踔墜逆於地逆恨刃其背棄諸野制府祁公聞而義之募力入賊所以馬歸

卒不食死林司馬福祥作詩余和馮詢

嗚呼公馬死不死馬有主人公有子一家血染三江水
戰場踏碎雄心起我公愛馬如愛兒馬與公子皆權奇

銅聲敲骨瘦愈健傷哉一蹶乃不支公子死公公死國
馬兮未死馬非駒銜辛嚼苦不敢嘶似爲報仇甘受縛
豆香芻滿棄弗顧番兒墮地羞轉怒腰下三看俠士刀
欲殺不成委諸路祁公聞義爲馬悲募客捨死求馬歸
豈知馬義匪獨在仇敵但非其主粟不食嗚呼安得有
馬如此雄駕馭想見吾陳公公今死矣氣如虹馬亦上
天爲神龍

豕道人

宿遷民家有大豕夜中火作豕狂號破門
直入主驚起急撲滅放此豕極樂庵中每

出聽經僧
呼爲老道

郭儀霄

中夜破門闖封豕家人焚焚走驚視但聞豕狂喊未已

祝融燄燄火光起四鄰撲救挽江水頃刻撲滅大歡喜
主人感豕全其軀送養佛寺益蒼肥聽經叅佛如僧徒
僧寮重之老道呼吁嗟老豕具靈覺一點真心尙昭灼
世上侏儒徒齷齪儼然爲人不如畜

義貓行

家畜一貓毛純黑呼曰烏奴每呼恆應有隣貓來覓食卽食烏奴餘食烏奴臥視不逐後遂並食烏奴少食輒止又若讓之者是亦知恤類推恩乎作此程襄龍

貓犬饕餮徒食乃爭之府當其營飽時猜忌到同伍而
况非並畜旁睨能無怒異哉此烏奴雄駿氣如虎啖鼠
不唾餘獨解恤其侶隣貓鳴鳴來索食肯推與似憐彼
鳴饑同阜輒少取彼貓了無驚譎若依仁宇物性與人

殊胡然誼猶古族類傷秦越。簞豆動齟齬。惟貧斯寡恩。惟暴斯獻侮。吁嗟乎烏奴人羣多愧汝。

貞雞行

祝維詰

吾宗有賢弟。居在村南街。家畜兩黃雞。乃一雄一雌。朝食或共啄。夜棲或同時。有狸賊其雄。雌者鳴聲悲。羽毛獨憔悴。矜顧常寡儕。一雞色純白。朱冠雄綏綏。暝睛相礫裂。終始不肯偕。童奴見之怪。欲以釋疑猜。卵生轉使伏。一一不能孳。始信微物內。有此良足奇。養逾三四年。委蛻忽如遺。主人憐其貞。掘地埋枯髀。吁嗟婦人德。從一古所推。奈何多失行人。而不如雞。短歌紀此事。聊爲

苦節規

觀鳥哺兒有感

徐善建

抱兒嬉樹下新綠遮庭戶忽聞啾啾聲仰見春鳥乳不
辨誰雌雄四翼共辛苦一出掠春蟲一居禦鷹虎出憂
居力單居憂出遭罟瘁羽豈暇梳嬌音不遑吐黃口快
得食那知翁與姆感此撫童雛何如此禽羽上念父母

恩淚下如注

沈歸愚曰感觸已之哺兒因念父母育已之恩愀然可以教孝

擊鷹篇

有鷹搏雞雛爲其母雞扶去一目因斃其雛切於慈伏其子之一心也亦雄

矣哉因作是篇

周駿發

鷹鳥擅搏擊厥性悍而鷲寒風氣肅霜感候愈殘恣側

國朝詩錄

卷二十一

靈異物性

七

腦暈星眸摩空挺健翅如鈎雙爪銛如劍利吻試淺草
兔爲擒泗淵鱗莫避偶然飽雞肋餘技等兒戲今晨聚
衆譁咄咄詫奇事走視籬柵間麩麩一鳥墜搯搯敗翮
張模糊血眼膩吁嗟爾鷹兮殪此出不意廚僕前致詞
告我聽詳備捷下攫雞雛無聲倏搶地羣雛慘不驚一
母擊恐遲氣猛軀可捐事迫力全萃痛心本切膚快意
在挾背立見俊厲物失勢遭顛躓嗚呼慈母心殺仇保
諸稚當其擊鬪時似奮當車臂竟爾弱勝強勇哉仁且
智杼毫寫作歌肇札寄長吏父母繫斯民卵翼中懷擊
不能卵翼之矧乃殘虐肆對此擊鷹者莪冠有餘愧

慈猴行

三台樊變堂述其
過定遠廳贖猴事

郭儀霄

三台有樊君爲我述往事歸過秦蜀界萬山立攢刺更
厯星子山險峭路不易仰觀雲日暗俯視心轉悸下馬
策刀柄曳步凜欲墜同行三十人路遠隔幽邃秃兀立
黃猴手握刀柄欬叱之乃長跪兩目垂老淚似覺有所
求中懷深詫異忽聞伙伴言猴非無因致衆過沙河灘
曾捉小猴去急欲取厥子人衆情轉畏樊君立命僕金
贖小猴至猴見小猴喜火急負肩臂叩頭迅飛逸物情
如此攀憶昔潞河歸數月糧倉寄夜苦小孩啼哽咽不
忍睡問家云數里問年今九歲饑父哈兒來母不知兒

棄兒願共母，飢不願稻粱。飼倍金爲兒贖，買者不允議。
父子乃天性，斯人遜畜類。感此黃猴慈，爲表樊君義。

高隱

樵歌行

張祖望自號西山樵夫嘗以漁父詞贈予故有此答

沈謙

西山樵夫方壯年，手持樵斧西山邊。朝向西山石上坐，
暮向西山雲際眠。行人過者問樵夫，願君共坐語斯須。
美髯如戟好身手，虎狼不顧千金軀。深林杳杳白日落，
請君且去住城郭。豐貂錦衣不識寒，肥肉美酒供大嚼。
暫時俯仰誰復嗤，恐隨霜露填溝壑。樵夫不答自微吟，
東江漁者知我心。

漁父

邵長蘅

東湖有漁父。艇倚清溪瀨。垂竿秋雨。中櫂歌夕陽外。九月蘆花白。西風鯉魚大。釣亦未必得。得亦未必賣。扣之默無言。鼓柁悠然邁。

曠達

麻城贈枯木大師

方文

富貴人所欲。今人亦何偏。自少至於老。無時無糾纏。聲色好美麗。飲食求甘鮮。宮室喜華侈。車馬爭肥堅。雞鳴日莘莘。數者恆不全。名利雖殊途。其意乃獨專。獲十必覬百。獲百必覬千。獲千必覬萬。百萬猶欲然。所以終其

身困憊無息。肩名節亦可毀。軀命亦可捐。廉恥道盡喪。
所嗜惟裘裘。末俗有通病。盧扁難以痊。達人非猶龍。烏
能拔重泉。吁嗟槁大師。所謂真豪賢。師本貴公子。家世
甲湘川。弱冠富文采。風流復翩翩。才名馳海內。震動三
十年。注官執金吾。出入禁掖前。夷然不屑顧。逸氣凌蒼
元。平生好游俠。賓客常滿筵。搗詞進吳越。擊劍來幽燕。
一贈輒千金。一歡動萬錢。有時涉江湖。柱楫沙棠船。有
時歸里閨。寶馬珊瑚鞭。良疇被原野。廣廈通市廛。歌舞
充後房。諸姬鬪芳妍。及時共娛樂。甯復知憂愴。一朝遭
世變。陵谷倏以遷。師乃抱大痛。祝髮逃諸禪。他人逃禪

者尙不屏世緣師於一切累曠然無拘牽有子才五齡
秀慧誕自天厥母年始笄嬌弱尤可憐繼室亦蘭茂嗣
君復珠圓師悉不介意棄之如浮烟芳潔且勿愛何況
腥與癘有田八百頃百頃遺乃傳其餘散宗族以半爲
佛田世間貪慳者視此奚天淵師悟懺悔理自陳昔多
愆從此習苦作不令體柔便一笠一蒲圍行腳荒江邊
晝則倚樹立夜則枕石眠肘見知衲破踵決知履穿飢
時向孤村持鉢乞粥籩噓爾色不忤呵之貌益虔或問
師名字師默不肯宣浮雲翔野鶴高樹鳴秋蟬吾從出
家後姓字遂忘焉傍有識之者此是梅惠連

此身歌柬韓元少先生

吳 雯

此身謂非我，居然耳目能明聰。此身謂真我，呼吸不存

俄生蟲，臂彈尻馬甯異說，蠶蟻

見莊子

鴟掇

蟲名，蠶所化，見列子。

捐雷同世人紛紛轉茫味，因之刺竅爭蠅蠖，逝者如斯歎川上無言本自歸。鴻濛明明此意在，鄒魯其如雷霆乖盲蠶雕刻心思養口體，尋常貪恚成伐攻，福輕於羽不知載百年馳驟何終窮。美食投箸輕萬錢，崑冠大佩修高容，高名厚實兩俱得，聲華誰敢輕汗降。總使千秋尚餘慮，金蠶玉怨埋邱壟，水銀池沼雜鳧雁，可憐長夜魚燈紅。以此膠擾鄙鬻選，况復先聖多發蒙，十年有學

願無學相視而笑疇堪共先生文章具性道使我捧讀
心神融天授鉅手闡元化軒轅鏡子懸青銅昨日慈仁
一握手早愚薄日光玲瓏吉人藹藹見真趣竚令塵土
開心胸世間原自多上士轉忘纓紱分雌雄長而不宰
果何德從斯永擬參猶龍

短歌行

盧存心

來日苦少去日多雙九頭上如拋梭人生百年能幾何
中間百折百消磨林無靜樹川無停波綠鬢婉婉白髮
皤皤北邙蒿里催則那地下不能將兩娑不如且飲金
叵羅愚者不飲達者呵來日苦少去日多

兩娑語
見世說

城西路

周大樞

城西路秋風蕭蕭白楊樹下有千年土骨堆聚魄斂魂
不知數噉噉宵啼雜新故高冢如山象祁連石麟斷折
埋荒煙卑者如垤亦如堆斷骸零齒桐棺穿鬼伯催人
入黃泉幾人白日飛上天彭篋壽骨終亦歿何況富貴
如秋草君不見鳳城八十黃閣老昨日朝中進遺表

牽車圖歌

許滄亭觀察繪圖將一家人物器用盡
置車上主人負長繩曳之而走有持鞭

者暗中監督亦
借圖醒世之意

袁枚

全家置一車主人牽以走車中坐妻孥車傍立僕婦車
頭載尊轡車尾曳箕帚更有暗中神持鞭督其後雖休

勿能休自辰直至酉日暮途窮時精神難抖擻猶有春
戀心一步一回首試問牽車人何如車上狗狗態尚安
閒汝身能逸否但願繩忽斷牽覆車中酒或者醉糟中
一笑且放手

長沙老人行

傅學沆

長沙老人七十九白髮星星未衰朽腰繫青銅三百錢
日向街頭沽美酒自言本是金陵人漁船作業常辛苦
打漿每經桃葉渡賣魚時過石頭城有時北風動地起
漁船卻在江心裏出沒洪濤命似絲歸來把酒重歡喜
前年落拓入長沙洞庭喬口便爲家夜看湘妃踏明月

畫聞商女彈琵琶水邊自見顏色衰日日蒲萄添幾枝
今年此船還屬我明年此船屬阿誰我對老人深太息
知君不是漁船客一語分明喚醉人十年悔不參禪席
劉參軍李青蓮呼取樽前費十千總死亦得稱神仙君
不見漢武甘泉祈不老茂陵依舊青青草

贅言

袁樹

人生百骸軀本自無而有來惟裸四肢去仍空兩手身
體髮膚外何物非敝帚卽此髮膚身千霜同一塵魄僵
魂作鬼鬼亦誰見眞至人破元機超然駕仙馭不閉羽
化時攜帶一物去飄飄丁令威化鶴一來歸城郭雖已

故人民俱已非浮雲不留影虛花不成實前日金張第
今日蓬蒿宅轉足舊路迷欠伸前夢失愚哉牛山悲孔
劇相從泣

放歌

沈赤然

君不見地上土皆是古人血肉腐又不見地下金皆是
古人埋到今今人得之用不盡身已黃泉伴螻蛄何須
竊笑古人愚畢竟後人還爾哂貧兒無一錢有時乞食
終天年富兒米萬斛誰能一餐五斗穀他時相遇九原
中赤手交看彼此同苞苴難入阿旁手關節不到閻羅
宮豈知我富不在已衣無求華食無旨人間山水盡園

林天上雲霞皆錦綺。東家紅腐粟。西家朽貫錢。主守何妨暫勞彼。平生況有翰墨娛。寇盜不剽藏書厨。黔婁猗頓任來往。以我視之初無殊。持此語人人大笑。誰識此言旨。趣妙請看山下土。饅頭不葬金銀葬髑髏。

得失行

趙嘉程

萬物得失之在人。亦有緣數爲之因。大而黃金萬鎰稱巨富。小而一纖一介依素貧。緣數已滿卽自去。知其道者誠有神。我觀人世之間。槩如此人。但未能釋然耳。每於一物致留連。夫何未達其中理。一物來歸信有緣。莫知其爲皆自然。一物相失亦有數。或於頃刻或朝暮。歷

數平生閱歷中約畧與今情事同。今乃自招尤悔至得毋有窒而未通。此身尙是儻來物。有無之間何所乞。一身之內難計謀。一身以外無窮訖。紛紛來者皆自來。等閒去者亦自去。愛憎不由人主持。存亡畢竟有歸處。

放言

又

人生行樂耳。須富貴何時去者不逢。今日之昨日來者未定。此期之後期。古來聖賢皆信命。况其下者無前知。坐上有花樽。有酒雜言剩語。皆爲詩。此身之外委造化。亦非在我能主持。苦憂思徒爾爲我。既不能如我意。尙其樂此夫奚疑。

詠懷

陳寅

人生惟百年焉能逞所欲何事徒營營憂慮如不足金
貝防盜寇繫帶恐褻辱富貴可長保壽命應催促蓋棺
事已定心多未了局何如且放懷一杯春酒綠
林際飛鳥雀山阿臥羊牛凡物皆自樂而人獨多憂經
營百年內瞑目方咸休恩怨心不死爲鬼且啾啾所以
明道人身外無所求讀書養真性浩然與天游

薤露歌

孫源湘

薤上露朝易晞昨日生人今日屍昨日耶孃相對面今
日有目不復見昨日妻孥相爾汝今日有口不復語舉

汝不聞毀汝不知所怨稱快所私銜悲。平時封殖心到此百不理。但見黃者金白者米大者珠小者瑯。輕者統重者綺一齊付與他人矣。落得灰飛半張紙。

黃金歎

又

報國助邊餉守土團鄉兵。人生忠義事多是黃金成。千金買顏色萬金買肺腑。見人口樸訥黃金自能語。一朝流光苦相逼金高如山買不得。烏虜功名富貴徒爾爲。不如酌我黃金罍。

演禽言

慧霖

提壺盧提壺。盧有花可賞。酒可娛。富貴神仙安可圖。昨

日之樂今日無萬事過如駒隙影有花不看有酒不飲
胡爲乎

得過且過得過且過仙厓一別五雲墮萬事由天不由
我進退兩難無一可憐多少忍寒餓慎勿行行且坐
坐

泥滑滑泥滑滑上天雨不歇失足難自拔前車可鑒後
車發日暮途遠更愁煞

行不得也哥哥行不得也哥哥山有虎兮川有鼉山川
險艱還易過荆棘當道將奈何雲濤變幻雨雪多江湖
何地無風波

止足

戒貪進

魏裔介

仲秋雷收聲孟冬地藏熱造物有息消運行故不竭區
區草與木順時以歷閱惠風方敷榮嚴冬乃隕折人生
快意時尤貴知所節奈何負乘子遂意多饕餮富貴能
幾何變幻隨風滅茂先空博物不畏中台坼士衡將三
世河橋一朝蠶蔚宗與宣明流連復狼藉斯輩皆名流
無計挽蹉跎何況吮舐者紛紛不足說達人觀其會寶
身以爲哲長嘯歸空山永與世俗別

低低屋

周子則山
所築書室

陸
研

古人築室所以待風雨不知努力營居處高臺連牆比
如鱗身在其中一椽耳君何爲耶屋獨低舉手直欲捫
檐宇雲松巢安樂窩君其聽我歌人生適意在容膝萬
間廣厦母乃多不見如鳥如顰大道東巍然層構碧霄
中主人不歸雙戶扃蛛網橫結蒼苔封不聞牆邊曝日
西鄰叟指點邱墟說烏有曾見危樓閣道來刺眼繁華
良未久不如且入低低屋團蒲枕玉方牀竹蠖屈蝸潛
聊自足詩不云乎謂天蓋高不敢不踟

兒輩慣葺屋宇作此戒之

尹繼善

到處可安居容膝不厭小人苦不知足營營何時了挂

柱與杏樑結構窮精巧大樹蔭亭臺新花環池沼疊石
爲奇峰呼春鳴翠鳥室多無雷同徑曲復深窈絲竹日
喧闐粉黛夜環繞古來富豪家似此知多少自謂享厚
福可以千年保詎意金谷園轉眼成荒草每誦傷宅詩
字字堪傾倒惟有儉樸風守之以終老小子旣讀書此
理宜參考百凡可類推何須過求好毋忽老人言聽之
復藐藐

收租詩

胡濤

家僮載米歸計點六十斛今年又歉收歲食諒不足轉
念無田者那得升斗粟人饑我不饑猶幸天所福

春春杵聲急杵多米珠白鮫揚去糠粃光輝照吾室自
是辛苦來顆粒皆可惜老牙便溫軟一飽有餘適

薄薄謠

吳昇

薄薄酒可適口黃酒價貴買論升白酒價賤買論斗瓦
瓶泥瓮稱意沽滿酌一尊旨且有何必巨觥雜小觴何
必碧香與紅友君不見貧兒吻燥手無錢道逢翹車口
流涎

薄薄棉可禦寒新棉色白最鬆軟舊棉色黑須復彈大
布毛褐依樣裁被之四體溫且安何必異產秦復陶何
必豪具貂豹躡吾不見西風颯颯吹窮漢短布衫衣不

掩骨

薄薄粥可果腹黍粥宜煖作嫩黃
豈粥宜涼泛新綠冰
藜鹽豉少許足飽噉一盂清且煖
何必粗糲調餽餽何
必牢丸佐餽飪君不見貧家日午
釜甑空嬌兒索飯啼
明東

喫粥歌

郝談

我無良田畝安得家穰穰
人生貴知足粗糲聊充腸君
不見今春兼旬雨沱滂農人驚
走告年荒搜索家無斗
米藏還有一箇喫粥方
澈底澄清波欲揚翻空滑膩匙
帶香一盃兩盃騰騰飽泚然額
上汗流漿側聞豪戶飮

膏粱青精白粲淨粃糠佐以餽珍侑以觴一日貧家千
日糧吾徒淪落在草野炊烟欲斷人淒涼任彼侏儒氣
昂昂士無一飯庸何傷倒床鼓腹歌嗚咽窗前浪浪雨
聲強

驕倨

袁枚貴人出巡歌見擾累門

睢陽吟

鄭虎文

路出睢陽郊步入睢陽城睢陽新尹吾舊識曷往見之
歡平生殘衫破帽手懷刺公然舉足登前楹忽爾叱問
伊何人側身磬折陳前因門者大笑揮手頻君其行矣

君勿嗔我從語君請君坐主人家住西冷渡閱閱原非
舊縉紳詩書漸改新門戶素諳心計析牛毛不覺居官
當奇貨已營橋實尙嫌貧便鑄銅山未爲富閨中少婦
覓金釵膝下嬌兒索紈袴猶然百計費持籌那有餘膏
及親故誰家少年腰麒麟朝爲農夫暮貴臣歸來偃蹇
驕其親區區行路何足論君其行矣君勿嗔

侯門深

張雲璈

侯門深深如海沈沈之中有人在走卒傳呼聲響高從
官驕貴容顏改雙扉照耀黃金鑲畫戟香凝日日看三
生未識蓬山遠萬里眞同蜀道難可憐手版門前客但

被豪奴雙眼白。坐來箕踞不動身。昨宵酒氣猶撲人。須
與傳出門內論。大聲謝客教且去。請看紛紛腰笏來。此
中那有君行處。昨不見主人云是趨。大府誰識金尊醉
歌舞。今不見主人云是案牘勞。誰知睡起日上三竿高。
豈不聞倒屣中郎謁。結轅何妨廷尉屈。人生何處無傲
骨。但願懷刺如禰衡。不願掃門學魏勃。

卽事

又

有客初遷官。意氣旁無人。面日旣已異。冠佩亦已新。顧
盼頗自喜。咳唾皆生春。舊時同流輩。強欲與之親。雖然
自蹇貴。亦勉爲逡巡。旁觀有冷眼。欲障元規塵。移吾牀

遠客此語非無因

太守怒

曩大學士福康安督蜀勢張甚鈴下厥養憑藉搏噬一口輿夫入人家攫釵珥都司

徐斐見而訶之其黨伍粹徐捷辱冠服皆毀姚公令儀方爲成都太守捕治之斃其魁公相怒曰守敢爾詰之則抗辭以對時已奏擢川東道乃遣騎追前疏還然公直聲震蜀中矣公歷官至四川布政使蜀人習聞其事因作是篇

吳振棫

都司訶輿夫怒老拳摔胡苦枝梧輿夫譁太守怒赤棒聲中一城怖太守謁相公怒守不遷官守自誤吁嗟乎輿夫之怒速其死相公之怒庸才耳太守之怒強頂矣

擬新樂府當關僕

彭兆蓀

睥其目瞬其腹狐裘貂冠尾禿速一刺價值千鍾粟身

是貴官親信僕貴官如神天上坐卑官如鬼候門左以
鬼見神勢本難况有虎豹常當關虎豹當關差勝若不
爲錢刀濟其惡

奢侈

石車行

汪懋麟

四輪轟轟連二車兩行百二青驪騮中載巨石屹山岳
車上一人聲喧呀手持大竿鞭衆馬竿繩搖動如長蛇
車聲動地作霹靂所過街市揚黃沙試問輦石此何用
甲第新築侯王家山上白石採已盡城中土木方無涯

買吳兒

吳震方

朱門大道邊堂高鬱嵯峨問言誰家宅冠蓋相經過答
云作官歸位尊而金多前堂接賓戚後堂羅青娥千金
買吳兒命工誨之歌廣曲傳新聲朝夕奏陽阿別館恣
遊賞園林貫清波流光晝苦短秉燭莫蹉跎忽見滿鏡
霜奈此吳兒何。

吳趨
酒船

邵長蘅

峩峩白鷓舫漾漾十丈餘綠絲持作竿木蘭持作艫周
遭紅闌干碧紗交綺疏吳儂大好事用以供遨嬉叶船
船競裝束日日追歡娛舟人設供帳舟婦理中廚飲客
惠山白清醪冰玉壺薦客吳羹味江跳壓松鱸纖指弄

嬌絃朱脣發清謳叶戲具拉維陳投瓊列擣蒲小娃年
十五韶慧無匹儔叶行酒工調笑樂方良獨殊人言吳
儂樂我笑吳儂愚中人一家產酒船一日需十船十中
家漏卮焉不枯巷有饑餓人晨突炊無煙奢靡何以救
會須燔其船念此坐太息惜哉我無權

周士彬石櫛行
朱樟廢府行並見富貴門

冰鮮行

顧光

玉河冰凝吹霜風鑿冰夜叩馮夷宮
罍師竭澤獻王鮪截流一網織鱗紅
誰憐白小亦羣命雪融冰結交連筍
包茅飛騎里二百離紅及膾晨餐充五侯
之鯖尙珍異

食單未許郇公工紫駝紅羊出蕃外萬錢一箸愁盤空
有時銀絲作羹品澹泊欲擬山家翁味腴香細弱無骨
莖以玉筍黃芽菘綠天廳事絳炬籠磁盆早出唐花烘
橘香泉酒蠟紙蒙琉璃深杯百罰終庖人行羹真當中
銀盃盛雪若虛盅舉匙一呷心氣融洗盞更酌飲長虹
是時客子末座從持杯不飲心忡忡人生豐約原不同

二七鮭菜庾郎窮

制府來

客述制府始末甚詳因成樂府四解誌往事微後來也

沈德潛

制府來勢炎赫上者罪監司下者罪二千石屬吏驅使
如牛羊千里輦重來奔忙鞠厯上壽登公堂制府賜顏

色屬吏貼席眠破得百家產博得制府歡制府之樂千

萬年

解一

揚旗旌麾三軍制府航海清海氛聲名所到

步步生風雲居者闔戶行者側足但稱制府來小兒不

敢哭軍中隊隊唱凱還內實百貨裝樓船文武郊迎趨

趨不得近前制府之樂千萬年

解二

制府第神仙宅夜

光錦披牆壁明月珠飾履舄貓兒睛鴉鵲石兒童戲弄

當路擲平頭奴子珊瑚鞭妖姬日夕舞綺筵賞賜百萬

黃金錢天長地久雨露偏制府之樂千萬年

解三

太陽

照冰山傾黃紙收制府片刻不得暫停輶車一輛千里

無人送迎婦女戩手詈童稚呼其名爰書定在旦夕求

爲斯養廝養不可得盤水加劍請室間從前榮盛如雲
煙制府之樂千萬年四解

青山莊歌

趙翼

毘陵城北皆平地何許林巒疊層翠路人說是青山莊
門帖新題官賣字我來出郡偶經行款戶曾無主出迎
繡闥雕囊空尙在殘山剩水不勝情頭白園丁老扶病
爲余縷述資談柄園是前朝貴介爲依稀記得延陵姓
後屬安昌相國孫廿年行樂尤繁盛相國勲名在廟廊
清貧未有午橋莊令孫繼起爲方伯分陝曾裁召伯棠
罷官歸徙常州住百畝林扃供散步入門便陋舊規模

大笑前人太寒素已編錢埒買堂成拚倒金贏將地布
不覺松杉也改觀何曾臺榭還如故繚垣螿異枳編籬
砥室築臨花夾路十馬馳毬關作場百牛拖石排依樹
粉本溪山似幃懸壁衣簷溷皆紗護一重一掩景迴環
某水某邱途錯互倚杖疑探栗里幽汎舟訝入桃源誤
勝賞經年興不殘四時花鳥暢游觀清音警露鳴仙鶴
浩態矯春豔牡丹西府海棠移釦砌上林盧橘植雕闌
跳波魚婢能知樂挂檻鸚哥解勸餐園林成後教歌舞
子弟兩班工按譜法曲猶傳菊部箏新腔催打花奴鼓
反腰貼地骨玲瓏擎掌迎風身媚嫵阿誰棋墅伴壺觴

綈几羅幙樂未央幸舍賓朋珠履貴便房姬妾翠鈿香
傾城妓入籠鷺館要路官登射鴨堂熱客倚冰終日計
乞兒向火一羣忙主人自顧矜豪放揮霍不將錢麈障
博局籌償舊帑錢纏頭錦出新花樣茶經蟹眼淬旗槍
食品猩脣調醯醬蠟淚成堆更燕膏酒瓶臥壁仍傾釀
笙歌酣倚賞花亭燈火醉歸邀月舫自製當筵上壽詞
青山與我長無恙豈知卮漏比泉流猗頓潛懷折閱憂
已失又思求寒馬未蹊輒欲奪田牛豪名本足招人妒
禍事眞成與鬼謀張樂正期投轄飲叩門忽報檻車收
填尸園土悲黃犬回首歡場付爽鳩春夢一場那可再

祇今惟有青山在。青山也要屬他人。官價三千聽人貨。
猶憶倉皇對簿趨。難憑復壁寄錙銖。委地圖籤爭剔玉。
隨身衣履敢留珠。翻教百口求春貸。那有千金賄獄輸。
籍到平泉花木簿。林霏亦似淚模糊。平生枉使錢如水。
此日人情薄於紙。有誰廣柳路旁迎。并少綠珠樓下死。
老僕如今也入官。仍充園戶守荒寒。飢窮全仗遊園客。
給一文錢一度看。往日監門梁肉厭。近時失路斗升難。
我聞此語心振觸。信有興衰如轉轍。重向林巒曲折尋。
繁華彷彿留人目。垂楊影裏釣堪垂。秋樹根邊書可讀。
愛山我乏買山資。有山渠少看山福。畫寢香消落燕泥。

空堂氣冷飛蝙蝠平津廐庫古曾悲華屋山邱今莫哭
梓澤風流昔未經踏春偶到訪池亭無端一段園丁話
說到傷心不忍聽日暮歸途回望處夕陽猶照晚山青
錢維喬吳中吟裘馬歎見富貴門

清江行

爲福公出征後藏過綿作也公館之盛互古所無因用杜詩綿州公館清江濱句起

李調元

綿州公館清江濱棖題畫桷高閉閣水晶爲柱玻璃楹
四面光射窗櫺明紅羅細疊瓊瑜平翦錦百匹懸爲棚
兩廊陳列充琇瑩金枝向夕飛流星九華照耀銅龍檠
洞房尙少卓倚屏花欄紫檀民不甯借問何官不敢名

田禾將軍方進城。一齊鐘鼓聲鏗錫。肉山酒海人縱橫。
三聲礮作晨登程。花欄紫檀俱隨行。

使者來

途遇權關使者輿從甚都畿無宿處局促野店中作此

張雲璈

使者來道旁車馬聲如雷。十輛百輛同崔嵬。十騎百騎
相喧豗。一舍容不得聯絡數舍暫休息。金鞍玉勒照街
衢。使者童奴好顏色。好顏色。仗官府叱咤。暗鳴莫敢侮。
敝車者誰買買來。予門前無止所。東箱矮屋燈燄碧。
四壁陰沉土氣積。臥枕蕭蕭連馬槽。牕風淅淅緣蟲隙。
我方局促不得眠。起視堂上正冥然。昨宵轟飲尤喧闐。
燕姬吳裝蜀國絙。左右顧而咳。臧獲之輩奔走相後先。

此曹威福已如此其主安得不帝天。君不聞一琴一鶴
古所羨清德於今本難見人生富貴誰與儕城狐社鼠
何榮哉榮莫榮於使者來

廚娘曲

程晉芳

江瑤橫玉柱猩猩點絳脣名都豪族聚八珍致彼難得
物奉此無用身搗來誰擅調烹手廚娘家家爭聘取輕
袿淡抹釵綴玉入廚先審火候足醃鹽蔥澆總不除到
手能令滋味殊紛紛肉食久生厭別開新意陳嘉蔬來
其一品費錢萬卻用侯鯖相燉鍊冰盤錯雜果蔬鮮饌
枝刻葉逾精妍銀刀善藏歸去晚風吹鬢花香氣遠廚

娘曲。耽口腹。溺醜毒。不如老僧敲鐘煮芋粥。

觀燈行

吳錫麒

請停踏燈曲。聽我觀燈行。傳柑纔罷元宵宴。連轡來游不夜城。一條軟繡吳山路。行行不斷衣香度。氤氳散作萬家煙。縹緲聚成三里霧。銀花火樹層復層。四圍簇擁明霞蒸。途分寶馬香車出。價合南油西漆增。銅街蹴踏喧塵土。還往渾如迷處所。竹騎爭迎太守旗。秧歌賭唱田家譜。東風吹雲雲不行。半天捲起皆春聲。樓頭幾處吹瓊管。院落誰人奏玉笙。玉笙瓊管朝朝聽。此度尤添少年興。魚龍曼衍水如飛。星斗盪搖珠不定。美人家住

大道邊晶簾乍啟側花鈿貪看陣陣紅燈好要祝年年
明月圓年年難得豐登樂三五良宵及時約比戶通明
坐蜃窗重闔詆蕩開魚鑰武林舊事紀繁華舞隊依然
南宋誇雪滾萬團蛾放鬧雷轟十棒鼓催搗蟾蜍下與
燈光并和月和燈千萬影徹曉安知蠟燭灰燒空不許
姮娥冷可耐笙歌散舞筵可堪羅綺歇華年閨燈也慣
杭州謔買夜徒輸使宅錢清平官長同民好豈料窮簷
轉嗟悼枉教皮裏竭脂膏誰向田間照虛耗自笑書生
計已遲夢梁一枕醒方知卽看淚液銅盤後何異憐飄
蔓草時駢頭雁足紛何限牆腳塵埋難到眼回首朱門

幾梳燈。此是中人十家產。

王蘇熟竹牀吟見貢獻門

吳門燈船行

陳文述

晚波潑灑生微風。山塘幾處燈船紅。紛若流螢散秋浦。
繁若列宿懸高穹。芙蓉雕舸木蘭楫。一道流紋波影接。
處處清歌按柳枝。家家少婦攜桃葉。水底殘紅送夕陽。
漸看列炬照明粧。迴眸脂暈重重發。壓鬢繁花冉冉香。
野曠風高燈影亂。南油北燭更番換。船中沈醉冶遊人。
那知絡角斜銀漢。我到吳門十五年初來。曾未見燈船。
噉嘈絲竹繁華地。競渡詩成感暮煙。年來漸漸燈船起。

香囊四角嬌羅綺但照濃歡不照愁翠翹列坐銀屏裏
今歲燈船二十餘蘭橈桂檻颺流蘇九華鏡捧金支樹
萬顆爭浮合浦珠君不見金蓮獨對明溫室天祿校書
輝太乙幾人封事爲蒼生禁鐘宮樹低華月又不見寒
儒皓首尙窮經寒女機絲夜不停辛苦分光乞隣壁秋
風憔悴感閒庭吳兒輕薄真堪哂甘使田園殉金粉蠟
淚銅盤賸幾堆何異黃金擲虛牝鳩鳥爲媒最不仁玉
顏多少委風塵燈船尙是尋常事整俗觀風或有人

官船行

王槐

舳舻曉動秋風生鑼聲鼓聲百里驚紅旗蔽江白日暗

地方大吏爭趨迎船中何所有金銀之氣冲星斗樂部
朝傳檀板歌妖姬夜醉蘭陵酒到處索牽夫牽夫敢怨
呼新霜著地草木禿忍飢耐凍行菰蒲有客歸舟歌激
楚停舟借問來何所答云來維揚今泣浙江澣維揚鹽
鐵天下都贏餘悉入使者廬浙江比較不什一商民何
以供賦租望舳艫歌嗚嗚爲商逐利愁剝膚有田不耕
何爲乎

講 堆鹽坵 警侈糜也

鄭祖琛

船頭擊鼓聲琅琅大包捆載來蘆場萬夫連臂如雁行
一堆兩堆作山立千堆萬堆苦未息赤足踏沙白干雪

海門落日寒無衣得錢且免全家飢東門換米西門歸
道逢主翁不相識豪奴夜擁飛輿出紅燈高宴梨園客

黃金貴

張朝桂

驛騎急制府來江南千里飛黃埃駛馭巨艦橫江岸
金伐鼓轟晴雷負轡抱弩紛載道奔走郡縣如與臺牆
締壁繡地紅錦所至不許見莓苔官廚八珍窮水陸煎
熬燔炙生煙哀姑蘇臺下夜宴開銀花火樹錯玫瑰丞
尹趨陪太守壽鞠脰共進南山杯徵歌選伎樂未畢曠
曠曉日升蓬萊曉日升制府睡制府一去廚傳空閭門
市上黃金貴

寶燭篇

銘 岳

貴人張錦宴歡笑生華堂華堂炷羅綺寶燭何輝煌紅
袖妖姬鳳管細綠衣童子龍檀香豹髓凝脂鍊錫屑
驪鬣繞頰飛珠光迢迢夜色爛如晝斜輝低射人影長垂
垂燭淚深翦翦燭心短燭心翦翦落花多燭淚垂垂良
夜緩不堪夜盡樽酒闌曉鐘初動笙歌殘三條燄冷銀
臺寂五花堆厚春風乾君不見短檠茅屋年年舊鐵炷
盛油生紫鏞大婦工織練小姑工刺繡機聲弄寒更燈
影耐殘漏村翁村媪垂百年不解青錢買烏桤

吝嗇

行路難

王熹儒

長安貴人富家子金多坐使身衣紫擁旄仗節生輝光
罷官百寶填歸裝子孫致產累千萬此翁粗糲惜一飯
君不見東隣狂客能使錢窮年讀書惟做穩

賣菜傭

彭兆蓀

生不願交賣菜傭寸絲尺粟親緘封生不願交賈人子
百歲心思在包匭十萬一紫標百萬一黃榜李核須鑽
籠須障子母兼權較銖兩世無梁伯鸞自熱不成爨世
無季布諾誰爲救急難不如去逐韓嫣流黃金尙肯輕
爲彈

出米歎

楊鏞

江南荒旱無積穀四野蕭條人盡哭長編大舸沂江來
所幸中州川廣熟富人屯米氣益揚市價騰貴封陳倉
且圖逐利補公賑可憐剝肉來醫瘡市中日午忽叫呼
貧民奪米如奪珠俄頃百倉無一粒白穰紅粟沾泥塗
奪者奔踣拾者吁貪夫口噤喧餓夫

感溺

燒丹行

王材任

延年有何術寡欲而已矣如何士大夫茫然昧此理肉
體能燒丹云自容成子方士神其說貴人聞之喜漁色

且得仙何樂不爲此多金買蛾眉滿室貯皓齒精神耗
鼎器性命付牀第內賊閨房招孽風衽席起紅粉歸他
人黃土埋自己女禍亡國家殞身亦幸耳彭祖八百歲
行此不知止晚逢鄭氏妻敗道至於死佳兵爲不祥老
氏有深旨慎勿近婦人攝生不如是何如飲醇酒日尋
佳山水

金尤行

顧豫

仙人不可求仙在環瀛翠水芙蓉倒影之瓊樓仙丹不
可服淋漓血肉之臟腑那堪金石搏東隣有子未三十
兩鬢青青姿玉立偶然筋骨苦欠伸積錢千百求仙人

仙人豈亦錢可使。仙人愛錢忽然至。金丸出錦囊。療汝不療之。膏盲食丹而瞑眩。使汝凡骨支支換。一朝三服。服三朝。形神喘喘。魂飄飄。跪向仙人乞。無死我方無。子白頭親老紅顏。驕語未及竟。聲忽落。額有微泚。神已邈。老親啼少婦哭。莫啼哭。求仙憐出門。急急求仙還。仙人已如兔脫強。

沈起鳳夜作畫篇見富貴門

張雲璈倡樓行見倡優門

哀貧夫

懲倖也

粵中吟之一

戴熙

市井渠魁創奇術。借事作鬪詭。難詰人各出錢。寄巨室。

託以幻名載之筆一朝發覆消息疾負者千人勝者一
鼓吹過衢路主人送錢布借問送者誰半是主人親與
故吁嗟乎貧夫終不悟

銘岳公子行見世祿門

足可惜四章

郭儀霄

足可惜忽聽琵琶淚霑臆古來燕趙多佳人桃紅李白
嬌青春纖歌曼語好顏色過牆鶯燕來陳陳腥風吹墮
愛河水飢寒賣入青樓裏誰將貨貝贖娥眉如此爲生
不如死君不見含羞媼女未肯前搗母鞭笞哀可憐
足可惜梨園多少風流癖不知何事趨若狂坐使聲價

奪珠璧嘈嘈切切絃索哀填街車馬轟如雷人頭簇簇
多於竹貼座百錢日不足淫哇冶調送歌喉色飛手拍
羣昂頭樓上官人高唱好雷同萬口聲浩浩須臾小史
下場來拍肩一笑顏爲開公子迷離忽不樂輕車延入
芙蓉幙歌罷平分白玉環酒闌將盡黃金鑷玉骨珊珊
絕可憐斟觴射覆長流連未必有情堅永好不堪薄義
失前懽君不見牀頭金盡無顏色幾輩英雄坐落魄猶
是當年顧曲人忽漫相逢不相識

足可惜光陰拚共黃金擲眈眈之目旁無人不惜精神
廢眠食自言消遣此最好不知魔障苦煩惱徹宵煎得

人眼黃葉子紛紛亂如掃君不見殘衫典盡誓不來明日又擲盤中臠

足可惜阿芙蓉毒流中國破產傷生害無極不知何故甘如飴非藥迷人人自迷一燈偃仰百事廢可憐銷盡英雄姿妖香淫氣燒入髓不戒亦死戒亦死面青肩聳人非人骨劍聲嘶鬼非鬼君不見衙門胥吏查鴉片中途過癮愁昏眩

紕繆

東家行

壬寅六月揚州事

吳嘉紀

東家錢多高興發娶婦無端當六月婦家愛女竟不辭

國朝詩錄

卷二十一

感溺

紕繆

手

楚練齊紈日夜治。治成衣裳粧次第。上著六層下著四。
綿綿纏纏直到老。風俗舊例重綿襖。一事違俗恐弗吉。
阿母不肯織。毫少女兒低頭泣。無言擁入繡輿。簫鼓喧
眼視新人就火窟。安能忍死到夫門。夫家賓客集華屋。
爐然松焰几燒燭。到處骨月皆鬼伯。忍將餘生相迫促。
有生歡樂轉成悲。始悔炎天作事非。裏尸更不需繒帛。
送嫁衣爲送死衣。

倪蛻頰花謠見婦女門

李調元石匠行見擾累門

武林樂接祖宗

陳春曉

七月新涼夜正中家家閉戶接祖宗接祖宗來從何處
論不遁送祖宗去自何方問亦窮若云祖宗須接送魏
魏祠宇亦徒崇春秋孝享亡是公癡男駭女多茫昧几
筵瓜果薦潔豐魂兮歸來半疑信搖搖燭影慘不紅十
二接兮十七送紙錢灰起隨飄風杭州阿獃俗尙同

又
慶冥壽

又

椿護茂高堂躋堂祝眉壽寸草樂春暉願以兕觥侑自
賦蓼莪篇哀哀慕昏晝孝子事死如事生春秋享祀盡
禮誠如何鄉里太荒謬百年風木心不驚欣說親年登
耄耄妄稱冥壽翻歡悅絳燭騰輝白日明紅瑜舞彩華

筵設不聞臯魚泣重進萊子觴梨園方奏響菊部且登
場兒女燈前笑不止狐狸塚上悲風起習俗相沿已如
此更怪紅箋書一紙紙上親題追慶子

勇伎

戴竿行

陳章

揚州春日好遊嬉雜技眩人靡不爲一人抱竿走來往
裊裊亭亭長數丈日午打圍場擇地得平壤頭顱樹著
若有根衝風趨赴不搖蕩或落齒牙或在掌一指承之
更惚恍妙在習熟無他訣不然齒折與腦裂何不驅去
爲邊兵國無遊手國乃清

樂鈞跳刀行見軍器門

壯士行

王豫

前有一尊酒高歌送壯士壯士起致辭男兒重倫理安
用盈尊酒一諾要生死落日慘夷門悲風咽易水長劍
四五動燈光爲之紫揮杯語壯士豪俠殊無比有勇貴
知方捐軀徒死耳及今川楚間小醜尙轉徙請從霍驃
姚立功垂青史

龍潭水嬉歌

欽善

赤日當午潮泥翻神龍躍浪天風寒豎尾昂頭攫珠戲
一渦水作千百盤西門白鱗北門黑東門青鬣南門丹

如沸人聲繞城郭疑有驟雨飛雲端刺虎繡鸞列雜幟
三軍司命標長竿遺俗南唐習水戰壯夫短袴緊袍欄
划槳劈刀執金鼓龍頭龍腹人蜂圍潑戲弄潮激潮怒
同聲一喊波底穿浪花陡起三十丈龍潭浩漭迴海瀾
酒瓶浮浪鴨撲灘百夫齊下爭飛湍簫管隱隱楊柳灣
釵環沓沓紅闌干五色險竿雲外望踏空直上如飛鳶
作跌直墜手指鉤翻身倒挂足趾拳以背承竿似箕簸
以臍點竿隨風旋解帶結竿左右跳以口銜帶身空懸
百般賭險衆目快駭技超出都盧觀死不自愛博一笑
其愚至此愚亦難

凶惡

猛虎行

無名氏

猛虎當道臥鷓鴣白晝嗚嗚於誰家屋魏氏三弟兄大
兒工刻剝次兒貌廉平小兒未有權但願學兩兄華身
綸冠裳藏胸排甲兵何以耀威武呼叱窮民驚何以富
田陌日夜圖吞并何以結豪貴匍匐慣送迎媚一以驕
百屈伸須臾更士人高象淵與魏爲鄰居世家頗豐厚
魏初愧不如上堂拜主人結納求吹噓高氏不識察往
還日無虛勸高無不爲就中坐侵漁三年獵其半五年
罄其餘從此與君絕不復談相於士人行太息貧富分

親疏我欲排闥闔上帝自高居我欲訴鄰里十家九踟
躕一語擾魏怒吾屬將爲魚幽并少年客鳴鞭馳長安
素志耽文儒結交披心肝嚴冬十二月狐裘憐高寒解
裘爲高衣問訊求其端高乃陳顛末客髮幾衝冠我家
君未知一門鷓鴣行竊慕平原君烈士相從將匣有寶
劍利客有專諸強戍樓月將落超垣入帷房闔門授首
領擊腦剗其腸便足洩君憤此舉亦大良士人前致詞
君母乃倉黃正當承平時魏惡亦未彰殺人者必死何
不自推詳客云旣爾爾君可便自爲當今邑中令清廉
復仁慈明白訴昔冤慎勿更遲疑高從訴邑令令便詳

上司上云魏氏惡剝盡民膏脂不堪其毒厲衆口俱一
詞下云爲官長沈痛民顛危安能助凶人坐令邑不治
上司覽大怒拜表執法辭傳命籍其家田陌盡散施騎
兵三千人快馬中宵馳列炬棲烏鳴門牆悉壞毀鐵索
聲鏗鏘三人愕無語堂室擬王侯金玉廣積貯輕羅斗
帳黃錦袍及珠履爲復至一處重門堅莫啟啟之赫然
驚尸骸相撐拒嚴詞訊家人家人白官府奴婢幾微失
刀杖此死所官府相顧駭軍士亦酸楚男婦二十人盡
數赴囹圄獄吏怒凶人驅之污穢處諸囚怒凶人恨不
卽刀俎天網烏能逃廷命俄至矣大兒工剝削還施其

身體霜刀百回揮化作俎中醢次兒貌廉平斷頭速棄
市小兒未有權邊軍聊充徙婦女十餘人並隨此小子
兩嫂哭失聲離禍當青年憶昔適豪家父母俱歡顏甯
知孽自作舉目誰爲憐存者往萬里死者淪重泉

野鷹來

邵無恙

野鷹來百族愁雙翅東復西燕雀羣啁啾百人乘大扁
戢戢水上浮健婦立船尾惡少立船頭持篙叩兩舷中
雜琅璫囚打門滿地坐意豈升斗謀一家米一石言取
不言求口稱官府知索米無罪尤鄉農畏衆怒瓶盎傾
乾餼斗粟那肯受干錢尙不收自誇東村過錢帛盈囊

投南村亦十千爾村甯獨不里有解事者斂錢丞相賜
是皆亡賴徒不散良可憂欲滿刺船去呼笑過前洲田
家作苦資索去無少留嗟嗟耕鑿人何以安故邱

死囧行

痛同安惡少掘小兒墳杭骸以食而作○囧同崽

陳墨

死囧苦死囧在世時有阿姥阿姥憐愛我朝朝得二三
錢買粗糲病中思食阿姥手製肉脯五月初五頸帶長
命縵誰知死後反受支解苦爐中火炭正紅將我鼎中
煮死囧何罪小小一屍身去頭手去掌足去股弱魂無
所棲且依弱草間夜聞風聲如撼山飄飄欲行山風吹
倒宛轉草間憶生時在襁褓阿哥爭攜阿姊爭抱親戚

稱乖隣人道好死乃受苦社日過及清明掃墳人來五
鼎三牲死困乞食隨風緩行中有慈心翁憐我伶仃分
我半盞羹再拜食之然後目有見耳有聞亂曰悲乎哉
彼童子兮夫何罪兮天固不可問也雖百千其身以誅
之兮吾安能抒此忿也

蘇
破鞞黨

陳春曉

著破鞞談道藝入膠庠登科第濫廁衣冠間自矜刀筆
慧狐狗漸成羣植黨假權勢公門出入頗自由結交胥
吏同詭謀有時要挾傾巨富有時攻訐誣良儔虛無平
地風波起三寸瀾翻掉舌頭鄉人求息事解囊充慾壑

既去還復來無厭更苛索君不見城北有人信佳士才
華第一蜚英起一朝波累鬼域使此生放廢棄鄉里奈
何破鞬黨惡不知止。

新詩

裹氊裘

警惡少也

周 凱

裹氊裘持戈矛白日入市尋仇讎爾刃陷仇胸仇刃斷
爾頭相殺無已怨無休官欲貸爾死爾生不可求法網
本寬嗟自投蚍蜉知朝夕螻蛄知春秋爾不惜身徒爾
憂曷不披蓑戴笠脫爾裘賣刀買犢歸田疇

劉珊看青謠見田家門

渡河行

自王家營至京陸行渡河處水深者雇夫前導之於是河夫索值必取盈焉迨得錢

則別使人涉水不應輒鞭撻天寒冰稜刺足裂
血縷縷日不過得數文錢夫河夫一匹夫耳非
有爪牙羽翼之寄

而肆虐已如是

沈炳垣

公無渡河渡河多坎坳公竟渡河河夫利涉波就深就
淺能導車輪過河夫什伍羣來前一車索取千百錢不
則笑客徒臨淵河夫得錢高岸坐揮使他人氣如虎代
予前導涉水澣問爾爲何人欲答語酸辛日日役河濱
一車錢一文天寒河廣冰齒齒予而行赤雙趾冰稜
刺足血不止烏虜弱肉強食竟如此此風豈獨河夫始

曠達補

寄感

董桂敷

轉轉腸中輪織得頭如雪盈千新慮生盜萬去景滅諒
無神鼈負詎有仙鶴骨浮雲太虛幻愁每天邊結天公
憫其愚靈之以日月天公善其慧妙運更消息念此心
目間超然頓軒豁

赴戍登程口占示家人

林則徐

出門一笑莫心哀浩蕩襟懷到處開時事難從無過立
達官亦自有生來風濤回首空三島塵壤從頭數九垓
休信兒童輕薄語嗤他趙老送燈臺

力微任重久神疲再竭衰庸定不支苟利國家生死
以豈因禍福避趨之謫居正是君恩厚養拙剛於戍

卒宜戲與山妻談故事試吟斷送老頭皮

宋真宗聞隱者楊朴能詩

召對問此來有人作詩送卿否對曰臣妻有詩云更休落拓耽杯酒且莫猖狂愛詠詩今日捉將官裏去此回斷送老頭皮上大笑放歸東坡赴詔獄妻子皆哭坡顧謂曰子不能如楊處士妻作詩送我乎妻失笑坡乃出

醒世詩

漆修綸

空拳赤手初生世富貴何人是帶來既不帶來難帶去
銅山鐵券總塵埃

達人

張維屏

百年三萬日一日十二時達人
有活法分算乃得之譬如昨日憂今日我弗思譬如來日難今日我弗知君看今日花前日猶空枝君看昨宵月今夕雲四垂宇宙六

傳舍去住無定期人生貴適意浮榮如電馳曷爲擲心
腎易彼毛與皮

止足補

雜詩

二十首

朱彝尊

飛蟲揚其羽乃爲蛛網得白鹿遊上林難免射人食君
子慎所趨毋以貪自賊不見冥冥鴻甯受弋者弋

吝嗇補

雜詩

二十首

朱彝尊

衡必錙銖爭錢必子母權佳李鑽及核曲防過其泉不
屑一毛拔而況千金捐舉世皆楊朱方思墨翟賢

國朝詩鐸卷二十一終

義行補

送師遠戍別友詩

李淵元雨村詩話盧雅兩初爲六安收識拔六安諸生夏湘人

之璜盧後爲醜使被劫戍軍臺賓朋皆失色湘人毅然請從行密爲治裝屬人繪軍臺負笈圖妻子哭於室親友餞於郊湘人飲

三爵飛馬去三年始歸有別友詩夏之璜

此身無復繫高堂萬里何妨別故鄉豈以激昂思厲俗
但令忠孝守吾常眼從大漠舒逾闊骨向堅冰鍊更剛
爲遜龍門千載筆滿筐巨軸貯歸囊